

草庐吴文正公全集

華君吳文正公全集

草廬吳文正公集卷三十三

墓碑

有元同知東川路總管府事孫侯墓碑

至大四年十月朔同知東川路總管府事孫侯以疾終于家其明年十二月將塋前溲浦縣尹蕭君以書來爲其孤福齡請徵文以表墓隧之碑孫蕭親也蕭予舊也其請不可違孫鉅族也侯美士也其美有足揚者遂不復辭謹按孫氏有三其一姬姓衛公子惠孫之後其一芊姓楚令尹叔敖之後其一媯姓齊陳無宇曰孫栢子其曾孫武奔吳爲闔閭將著兵法十三篇唐末有爲將

者率師駐虔虔化留而弗去虔虔化今贛寧都也孫氏
爲贛寧都人自此始在宋有介夫者與蘇文忠公遊侯
之曾大父汝成大父延休父德成世世韞德至侯彌昌
侯諱登龍字壽甫家饒於貲身饒於文早年以進士貢
平生視利如羽嗜義如渴凡凶荒死喪患難危急不間
戚疏邇遠周之拯之惟恐或後橋梁道路苟病於跋履
必爲完治雖費不計聖朝兵及江南山藪遐僻乘時嘯
聚侯扞衛井里獲全生聚者不啻數十百家行省擢充
南安路儒學正考滿勅授虔遠南丹溪洞等處軍民安
撫司儒學教授一以周孔之教變殊俗休暇之日引古

援今懇懇以告司政之官多所匡救裨益大德九年轉授同知歸仁州事越七年而有東川之命由將仕佐郎陞登仕郎不及拜命而卒年七十一初娶張氏生男二清臣獻臣丁丑歲俱殲于兵再娶揭氏以其子延臣歸侯子之若子各在吏部八品選中父有庶子九齡侯亦子之若子父命也三娶曾氏生男五福齡勅授瑞州路上高縣長官祿齡壽齡高齡女六適趙適楊適唐適胡適朱其季許適蕭庶子順孫命爲延臣之子孫男曾孫孫女一嗚呼侯富康而壽考子孫才賢而蕃衍浸浸顯榮非好德之福積善之慶乎心潛於義理文雄於場屋

誌侯之墓者云耳文章不及鳴於館閣政事不及福於
當道狀侯之行者云耳予夙聞侯譽又稽狀與誌而序
其槩如此繫之以銘銘曰

恂恂文儒行服鄉閭善累惠周天人交孚晚毓英胄繫
德之符小試儒官施未寸銖進貳郡牧胡不湏臾時用
之嗇後慶之腴穹碑差峩百世弗渝若稽前美允休允
都

元贈亞中大夫輕車都尉懷孟路總管武功郡侯
蘇府君墓碑

府君諱偉字大用其先自忻代徙順德大父元仕金官

號猛安謀克太母栗氏父清金拱衛指揮使皇朝贈中
順大夫上騎都尉同知延慶使司事追封武功郡伯母
李氏追封武功郡君中順二子良傑仕于廣平路府君
其次也孝友寬慈篤厚信實涉獵子史尤喜藏室漆園
之書收貯時賢詩文爲家珍采拾善人言行爲身範不
求榮進勤力治生家用饒裕量一歲所入所出幾何贏
餘悉以賑貧歲有常數凶歲則倍官所勸率不與焉內
而族親外而鄉閭饑者食之寒者衣之病者藥之死者
棺之孤嫠無依者居之養之婚媾失時者室之家之惠
加於人不自以爲德或忘恩負義橫逆來侵待之如常

畧不芥蒂追孝其先事亡如存晨夕必面朔望必薦雖
隆寒盛暑疾風暴雨不廢每勵子孫謂吾自幼知讀書
爲美事理家勞疾無暇時可學抱憾終身汝等庇蔭之
下飽暖逸居不學將何爲哉子孫承命競勗學業名卿
巨儒踵門隆禮尊崇諮訪爲善之方竟日不倦諸子出
外備防禦之器則喻之曰寇盜豈欲戕害人利其財耳
設有不虞舍財全軀彼如我何且爲善有福爲惡有禍
汝輩但勉爲善終不蹈危厄凡訓戒之言中倫慮達義
命徃徃類此至元甲午二月八日卒年六十八以子貴
贈亞中大夫輕車都尉懷孟路總管追封武功郡侯夫

人劉氏淑慎寡言內嚴外恕諸婦敬畏子孫遵守家法
三世同居大德壬寅四月十四日卒年六十九追封武
功郡夫人子四思溫思讓思敬思義克紹前志輕財好
惠自大德乙巳至延祐己未十五年間以米賑施及減
價平糶不啻數千斛楮幣五萬緡置局市藥所得子錢
修藥劑以濟貧病之人不取其直有戚屬不能自贍出
貲俾販鬻逐利因是豐足者數十家思敬繇廣福提舉
陞廣福監大監孫十二楨椿楫漆楨朴材杞桂其十蘇
同字仲元名木旁區準史遷稱趙談爲趙同例也其十
一曰粟其十二曰桐楫漆仲元俱仕中朝朴嗜文學別

立在長廬鎮曾孫志學志道鶴童志學仕爲長史大監
兄弟將刻石府君之墓仲元求予文文之予謂府君積
善樂施獲報於天身存而富身故而貴流慶衍迤末艾
也福善之理豈不昭昭也哉乃序其事而系以銘詩詩
曰順德之蘇徙自忻代爰逮亞中浸浸豐大惻彼空窶
猶已寒饑衣食所羸棄捐如遺施不責報時謂陰德天
酢其獻如稼必穡錫命寵光賁于九泉世胄繩繩霄翮
聯翩富貴在天維以福善勤名表阡彌久彌顯

元中子碑

元中子黎氏諱立武字以常臨江新喻人年二十人太

學二十六擢進士第三人大父母父母具存一時榮之
授承事郎纂書鎮南軍節度判官明年奉四親之官又
明年秋貢校文撫州又明年除太學錄又明年通判袁
州就任轉宣教郎明年冬除宗正寺簿明年夏兼莊文
府教授召試館職除秘書冬轉奉議郎以祖母憂
去國明年春除佐著作夏轉承議郎秋除著作赴國難
趨朝明年春除軍器少監國子司業且將大用而國事
夫矣間道來歸備歷艱險自是闔居三紀逮事二親猶
一十年北來達官聞譽望覩風采禮之如天人諏訪相
屬或延致或就見焉意度安舒威儀整暇不待交談人

已起敬清言疊疊每至夜分鷄鳴復興了無倦色少年
高科常懷謙抑篤志嗜學一如未仕處太學時有同舍
先達狷介人也數舉前修格言相警發持已接物資益
維多佐洪府時歲饑有同僚言殺一牛活萬蟻欲籍富
戶賑貧民駁之曰萬蟻固可憐一牛何罪而死衆稱善
噫有德之言哉官秘省時閱官書愛二郭氏中庸郭游
程門新喻謝尙書仕夷陵嘗傳其學將由謝沂郭以嗣
其傳故於大學中庸等書間與世所宗尙者異義生平
著述積藁如山演繹舊聞敷暢新得有圖有贊有講義
諸篇悉鈔諸木當路好事者徃徃取去去年六十八微疾

端坐而逝越六年歲在單闕日次星紀月離天街啓殯
墓于塏莊之原祖考瑛迪功郎考士雲宣義郎祖妣黃
氏妣蕭氏娶黃氏敖氏俱封孺人子男三本彊本正本
成女四婿胡簡徐敖孫男五元衍公衍宗衍師衍祖衍
女六伯兄立言國學進士好讀易纂諸儒所傳成一書
澄撫州校文時所貢士也後三十八年始拜座主于清
江之客舍一覲容貌心醉神融喟然曰世有斯人與世
有斯人與廊廟器也福德身也蓋雍容和粹氣象彷彿
河南程伯子云昔閬西張子卒私謚明誠中子質之程
伯子司馬公弗可遂止黎之孤暨門人援王文中爲比

以元中易名伯兄詳其事爲狀傳于世諸孤約其文爲誌納于壙矣噫孟有貞曜陸有文通河汝而後已然澄亦門人也而弗得與斯議也乃稽狀與誌撮其凡以碑爲墓隧銘曰

維德之中玉色山立師詹鳳儀疇泫麟泣斯焉斯逢斯逢斯豐猗與元中有百世公

耿縣丞封贈碑

高唐齊邑也幼讀孟子時知之今升爲州至元間嘗過其地在京城識學士閻公高唐人也越三十一年在金谿識縣丞耿君亦高唐人也君名居簡從事廣東宣慰

司都元帥府考滿受勅命初任將仕佐郎臨江路知事
再任從事郎丞金谿欽遇聖朝待臣之厚官七品得封
贈父母妻恩綸將下欲樹碑二親墓隧徵文於予竊觀
耿君自爲吏入官靡所玷缺事每稱職臣之忠也拳拳
焉以追贈其親爲榮子之孝也孝者仁也仁者必惠忠
者義也義者必廉夫苟忠於國孝於家廉於己惠於民
則爲人之大端具矣予安得不嘉其已往而勸其方來
也哉君之父諱潤贈某官母李氏贈某稱妻劉氏封某
階別書于左

故右衛親軍千戶武畧兵將軍墓碑

宣授武畧將軍右衛親軍千戶諱元鎮姓岳氏古修人
涉獵書史氣渾厚志雄邁處家御衆有法父雯自國初
乞乞效勞任景獻陵三州判官至北京錄事而終將軍
應募從戎戎帥以其父克勤王事俾長百夫從攻江陵
拔砮矢中股從攻樊城先登矢中頰從攻漢陽西墉從
攻鄂州東南隅俱有功又於岳州湖口獲數十艘俘百
餘人以獻中統以後從征李璫於濟南又有功至元五
年充右衛總把天朝方有事於南方從攻安慶從攻淮
安五河口十二年授忠懿校尉十三年又戰于淮安而
勝帥府以功上陞忠顯江南平軍使知其閑習軍務令

督軍器局十五年佩銀符陞忠武樞府調往上都率卒
供土木役罷進長千夫二十四年佩金符授武畧將
軍宿衛十餘年年六十八致仕娶李氏男四長蚤逝次
信次貞庶子順女二長適萬戶之子高某次適右衛千
戶鄭銓信以敦武校尉百戶戍嶺北後讓職于弟貞貞
在嶺北屯田軍食饒裕還守信安西永清壁迄今二十
餘年介國子學生姚紱來言曰貞賴先人緒業從事兵
間念吾祖吾父盡瘁報國備著勞績恐久遂沉湮願勒
文于石庶其不朽敢以爲請予謂皇元自開國至于宋
亡用兵百有餘年以殺獲攻戰立功者多矣而父披堅